

Livitiku

Mgo Udlin Tongod to Mgo Kapunganan ni Livi

Ka Tubad Odyow to Pog-awo to Sao

4²⁷ “Ko duon otow to koot-otawan now no ogpakasao no waro din tuuri no oghimu sikandin to ingkono to in-udlin to Magboboot, nakasao ian sikandin. ²⁸ Ko ogkataga sikandin no nakasao naan, og-aap sikandin to sagboka no boian no kambing no waro maroot no ian ka litos no igpanubad din tongod to sao din. ²⁹ Ogsampoongan din to boad din ka uu to sikan no igpanubad din tongod to sao din, woy oghimatadyan din to tubaranan to tutungonon no mgo igpanubad. ³⁰ No ighalit to taagpanubad ka tinuru din to langosa to kambing woy ipoid din to sungay-sungay to tubaranan to tutungonon woy igbus-ug din ka duma no langosa dio to diraom to tubaranan. ³¹ Og-awoon to taagpanubad ka tabo to kambing unawa to oghimuon din to tubad to pogkasagboka, woy ogtutungon to taagpanubad ka tabo duon to tubaranan no ogkohomutan ka Magboboot to pogngarog din. Sikan ian ka oghimuon to taagpanubad odyow no ogpokog-uli ka otow woy to Magboboot, woy ogpo-iguon to Magboboot ka sao to otow.”

Ka Pogkamatoy to Mgo Anak ni Aaron

10¹ No kuntoon, pigpurut ni Nadab woy ni Abihu no mgo anak ni Aaron ko mgo tutunganan dan to palina, woy pigsooran dan to hapuy woy to palina, woy nigtaruwoy sikandan to hapuy duon to Magboboot no waro din sugua no nig-atu sikandan to innangon din. ² No sikan ian niglibuwas ka hapuy puun to tangkaan to Magboboot woy pig-aboong sikandan to hapuy no nammatoy sikandan duon to tangkaan to Magboboot.

³ No nigkagi si Mosis duon ki Aaron to “Soini ka innangon to Magboboot to pogkagi rin to ‘Ipakita ku to mgo otow no ogdani koddi no in-oog a; ogkabantug a to pogpitow to mgo otow.’” Waro mogkagi si Aaron.

⁴Inpo-umow ni Mosis si Misail woy si Ilsapan no mgo anak to anggam ni Aaron no si Usiil, woy pignangonan din sikandan to “Kai kow; aapa now ka mgo suod now libuwas to pig-ugpaan to mgo otow, no ipamariu now to tangkaan to in-oog no tukbung.”

⁵No nigdani sikandan woy pig-aap dan ka mgo lawa ni Nadab woy ni Abihu no nigsau-ub pad to mgo kinabo to taagpanubad, dio to libuwasan to pig-ugpaan to mgo otow, sumao to insugu ni Mosis. ⁶No nigkagi si Mosis ki Aaron woy to mgo anak din no lukos no si Iliasar woy si Itamar to “Dokow ogbaagara ka bulbul now no kono ogsugkaron, woy dokow oghigbita ka mgo kinabo now^a, su ko oghimuon now sikan ogkammatoy kow woy ogkabou ka Magboboot to tibon koot-otawan. Di ogpakapandaawit ka mgo karumahan now woy ka tibon lunggunan to Israil tongod to mgo otow no pighimatadyan to Magboboot pinabadyo to hapuy.

⁷Dokow oglibuwas to gomawan to Tukbung to Pogtango, odyow no kono kow ogkammatoy, hoo su pig-oog kow pinabadyo to lana to Magboboot no inbus-ug kaniu.” No pigbabali ran ka innangon ni Mosis.

Pighimatadyan Ka Otow no Nigtungadyow to Magboboot

24 ^{10–11}No kuntoon duon lukos no ka amoy rin matig Ehiptu di ka inoy rin ian si Silomit no anak ni Dibri no otow to lunggunan ni Dan to koot-otawan to Israil. Niglibuwas ka sikan no otow taliwaro to pig-ugpaan to mgo otow to Israil woy nigpog-ogotoy sikandin to sagboka no otow to Israil woy pigtungadyawan din ka Ngaran to Magboboot. No sikan ian no pig-aap sikandin to mgo otow duon ki Mosis. ¹²Pigpakalabusu ran sikandin taman to ogkatagaan dan ka pogboot to Magboboot.

¹³No nigkagi ka Magboboot ki Mosis to ¹⁴“Aapa now ka otow no nigtungadyow dio to libuwasan to pig-ugpaan to mgo otow. Ogsampoongan ka uu rin to mgo boad to tibon mgo otow no nigdinog kandin, woy takas to sikan igparogpak sikandin to batu to tibon koot-otawan. ¹⁵Nangoni nu ka mgo otow to Israil no ‘Ko duon otow no ogtungadyow to Magboboot, ogsonditan ian sikandin; ¹⁶oghimatadyan ian ka agad hontow no ogtungadyow to ngaran to Magboboot. Igparogpak sikandin to batu to tibon koot-otawan. Agad

^a10:6 Dongan inbaagad to mgo otow ka bulbul dan woy pighigbit dan ka kinabo dan no indanan to pogpandaawit dan.

ko dagpu no otow sikandin woy ko tag-inugpo, ko ogtungadyow sikandin to Ngaran, oghimatadyan ian sikandin.”

¹⁷ “Songo oghimatadyan now ka agad hontow no otow no oghimatoy to otow. ¹⁸ Ko duon otow no oghimatoy to adyam to songo otow ogliwanan din ian – adyam no manokal liwan to adyam no namatoy. ¹⁹ Ko duon otow no ogpo-il to songo otow, agad nokoy ka pighimu rin ian ka igbadyad kandin; ²⁰ pantig liwan to pantig, mata liwan to mata, ngipon liwan to ngipon. Ko nokoy ka po-il din to songo otow ian ka po-il no iglogpad now kandin. ²¹ Ko hontow ka oghimatoy to adyam ogliwan to pighimatadyan din, di ko hontow ka oghimatoy to otow ogkohimatadyan now ian sikandin. ²² Sikan dod ka udlin agad ko dagpu no otow woy ko tag-inugpo.’ Sikoddi ka Magboboot no Igbudyag now.”

²³ No nigkagi si Mosis duon to mgo otow to Israil, woy pig-aap dan ka otow no nigtungadyow to Magboboot dio to libuwasan to pig-ugpaan to mgo otow, woy pigdoropak dan sikandin to batu. Nigbabali ian ka mgo otow to Israil to insugu to Magboboot.

Ka Tuid to Poghimooy to Tano

25 ¹ Nigkagi ka Magboboot ki Mosis duon to bubungan to Sinai to, ² “Kagi ka duon to mgo otow to Israil woy nangoni nu sikandan no ‘to poglopow now to tano no igbogoy ku kaniu, songo pohimaadya now ka tano tongod to Magboboot. ³ Sood to hon-om no tuid og-orokan now ka mgo kamot now, woy sood to hon-om no tuid pamungoli now ka mgo pinamua now no ubas woy punpuna now ka mgo bogas. ⁴ Di to igkapitu no tuid oghimooy ka tano to ‘Sabat’^b duon to Magboboot. Dokow og-oorok to mgo kamot now, woy dokow ogpamungoli ka mgo pinamua now no ubas. ⁵ Dokow oggarab to ogtubu do duon, woy dokow ogpunpun to mgo ubas no ogtubu to mgo inbaagad now no mgo pinamua. Oghimooy ian ka tano to sagboka no tuid. ⁶ Ko nokoy ka ogtubu to tuid to Sabat* ian ka ogkoonon now; sikoikow woy ka uripon nu no lukos woy ko boi, woy ka pigbadyaran nu no suguonon woy ka dagpu no otow no nig-agpot to pog-ugpo kaniu, ⁷ ilagkos pad ka mgo adyam now woy ka mgo magintaunan no nig-ugpo to tano now. Agad nokoy no ogtulin to tano ogkakoon now.”

^b25:4,6 Sabat: Hibriu no kinagian soini no ogpasabut ‘igkapitu’ woy ‘himooy’.

Ka Tuid to Pogkukuus

⁸“Soola now ka papitu no tuid no himooy - ian papitu no akob to papitu no tuid - odyow no ka papitu no tuid no himooy ogkohimu no kohop-atan woy sasiyam no tuid. ⁹Paraginga now ka budyung to tibon mgo ugpaan now to igkasampuu no allow to igkapitu no buwan to tuid; ian ka Allow to Pogpo-ul-ulioy ogparagingon now ka budyung to tibon tano now. ¹⁰Ooga now ka igkakalimma-an no tuid, woy ipoitaga now ka kalipuwasan to tibo no nig-ugpo to tibon tano now. Ogohimu no tuid now to pogkukuus; ogman-uli ka tibon mgo otow duon to tano to mgo kabuybudyagan dan no og-agpot to lunggunan to mgo kaminunaan dan. ¹¹Ogohimu no tuid to pogkukuus now ka igkakalimma-an no tuid. Dokow og-oorok woy dokow ogga-ani to ogtubu do duon, woy dokow ogpunpun to ogtubu to inbaagad now no mgo pinamua to ubas. ¹²Hoo su tuid to pogkukuus no in-oog kaniu; ogkoon kow ro ko nokoy ka ogkapurut now to mgo kamot.”

¹³“Ogman-uli kow tibo to kaniu no pigligkatan no tano to sikan no Tuid to Pogkukuus. ¹⁴Ko ogbaligyo ka to tano to sagboka no karumahan nu, woy ko ogboli ka to kandin, doka oglo-loiga ka duma nu. ¹⁵Ko ogboli ka to tano ogdoromdomon nu ko pila ka tuid ligkat to nigligad no Tuid to Pogkukuus. Songo ko ogbaligyo sikandin koikow ogdoromdomon din pad ko pila no tuid ka nagaat odyow to ogpunpun. ¹⁶Ko moon-ing pad ka mgo tuid, ogdakolon now ka igbadyad, di ko maintok do ka mgo tuid, ogmaintokon now ka igbadyad, hoo su ka maugot no inbaligyo ian ko pila ka ogkapunpun. ¹⁷Dokow oglo-loiga ka mgo duma now, di kahalloki now atag ka Magboboot. Sikoddi ka Magboboot no Igbudyag now.”

¹⁸“Babalia now ka mgo udlin ku woy dorodyowa now to pogpanalinga to mgo sugu ku, odyow no marodyow ka pog-ugpo now to tano. ¹⁹No ogmambogas ka mgo pinamua to tano, woy ogkabuung kow to ogkoon woy waro igkasasow now to pog-ugpo dio.”

²⁰“Naugpa ko og-inso kow, “Nokoy naan ka ogkoonon noy to igkapitu no tuid ko kono koy og-orok woy kono koy ogpunpun?”

²¹No, ogbogadyan ku sikaniu to dakol lagboy no pogbolig to igkohon-om no tuid odyow no ogmambogas ka mgo pinamua now to litos to tatou no tuid. ²²To pog-orok now to igkawau no tuid ogkoon

kow pad puun to napunpun now, woy ogparagas kow to pogkoon to sikan taman to pogpunpun to igkasiyam no tuid.”

²³ “Kono now ogduara ka tano no kono now ogkalokat, hoo su sikoddi ka tagtuun to tano woy pigpatag-tagooran ku ro sikaniu su mgo dagpu kow ro. ²⁴ To tibon mgo tano no oggon-gonan now, ogbogoy kow to daan odyow no ogkalokat ka tano.”

²⁵ “Ko ogkawaraan ka sagboka no otow now no ogduruad sikandin to baad to tano din, oglopow poron ka marani rin no suod no oglokot to naruad din. ²⁶ Di, ko naugpa waro otow ka ogpakalokat to sikan di to moorian ogmarodyow on ka pog-ugpo to sikan no otow no nigduad to tano, no duon litos no iglokot din to tano, ²⁷ ogdoromdomon din ko pila ka napunpun to mgo tuid ligkat to tuid to pogduad din, woy ogliwanan din ka inboli nokani no ogsalinan pad to kantidad to napunpun no ogbadyad sikandin dio to otow no nigboli nokani. Takas to sikan, ogpakalibong ka otow to pog-ugpo to taan no tano din. ²⁸ Di ko kono ogpakalimud ka otow to saapi no iglokot to tano, ogkagaat ka pigduad no tano dio to boad to otow no nigboli taman to Tuid to Pogkukuus. To Tuid to Pogkukuus, oglibong ka tano dio to taan no tagtuun, woy ogpaka-uli sikandin to tano din.”

²⁹ “Ko duon otow no ogduad to baoy sood to lunsud no nalingkusan to aad no batu, duon kantongod din to poglokot to sikan sood to songo tuid ligkat to allow to pogduad. Sood to sikan no tuid ogkalokat din pad. ³⁰ Di ko kono ogkalokat sikan sood to sagboka ian no tuid, ian tagtuun to baoy ka nigboli woy ka kandin no mgo tipouri taman to katamanan. Kono oglibong ka baoy to Tuid to Pogkukuus. ³¹ Di ka mgo baoy dio to mgo ugpaan no waro malingkusi to aad no batu ogdoromdomon now no unawa to tano; ogkalokat sikan woy ilibong now to Tuid to Pogkukuus.”

³² “Di ka mgo kapunganan ni Livi atag, ogpakalokat sikandan ladyun to mgo baoy ran to mgo lunsud no natagtuun to mgo kapunganan ni Livi. ³³ No, sikan ian ogkalokat ka mgo baoy no naruad to mgo lunsud to mgo kapunganan ni Livi, woy i-uli sikan to Tuid to Pogkukuus, hoo su sikan do no mgo baoy ian ka baad to mgo kapunganan ni Livi taliwaro to mgo otow to Israil. ³⁴ Di kono ogkaruad ka tano no pasabsaban no niglingut to mgo lunsud dan; kandan ka tagtuun taman to katamanan.”

³⁵ “Ko ogkawaraan ka sagboka no duma now woy konad ogpaka-udyag sikandin to pog-ugpo duma kaniu, buligi now sikandin

unawa to pogbulig now poron to dagpu woy ko otow no nig-agpot to kaniu no nigtagtagood do, odyow no ogpakaparagas ka otow to pog-ugpo taliwaro kaniu. ³⁶ Dokow ogpa-anaka ka inbogoy now kandin, di kahalloki now ka Magboboot, odyow no ogpakaparagas ka duma now to pog-ugpo taliwaro to kaniu no koot-otawan.

³⁷ Dokow ogpasamboy kandin no ogpa-anakon now ka saapi woy dokow ogbaligyo kandin no ogtimuan now ka badyad no inbadyad now. ³⁸ Sikoddi ka Magboboot no Igbudyag now no ian ka nig-aap kaniu ligkat to Ehiptu odyow to pogbogoy kaniu to tano to Canaan woy odyow no ogkohimu a no Magboboot now.”

³⁹ “Ko duon sagboka no duma now to koot-otawan now no ogkawaraan no ogduad sikandin to dadyagang din to kaniu, dokow ogpogos kandin to pogtarabau unawa to uripon. ⁴⁰ I-unawa now ka pog-otow-otow now kandin to sagboka no otow no inbadyad now to pogtarabau kaniu woy to otow no nigtagtagood do to pog-agpot kaniu. Ogtarabau ka otow to koikow taman to Tuid to Pogkukuus. ⁴¹ To sikan no tuid ogloka-an now sikandin woy ka mgo anak din, woy og-uli sikandin to kandin no lunggunan woy dio to tano no natagtuun to kandin no mgo kabuybudyagan. ⁴² Kono ogkaruad unawa to uripon ka mgo otow to Israil su pig-aap ku sikandan ligkat to Ehiptu woy sikandan ka mgo suguonon ku. ⁴³ Dokow oglo-loiga sikandan, kahallok kow duon to Magboboot now. ⁴⁴ Ko duon mgo uripon now ogligkat do sikandan to mgo koot-otawan no niglingut kaniu; ogpakaboli kow to mgo uripon dio. ⁴⁵ Woy songo ogpakaboli kow to mgo dagpu no nig-ugpo to taliwaro now woy to mgo anak to mgo kapunganan dan no no-otow to kaniu no tano, woy ogkohimu no sikaniu ka tagtuun kandan. ⁴⁶ Igkatugun now sikandan to mgo anak now ko ogkamatoy kow unawa to mgo kaaglagan no igkagaat woy ogkohimu sikandan no mgo uripon now tagood to manokal pad sikandan, di dokow oglo-loiga ka mgo duma now no mgo otow to Israil.”

⁴⁷ “Ko duon otow to loin no koot-otawan woy ko dagpu no nig-ugpo taliwaro kaniu no ogkadatu woy duon sagboka to mgo duma now no ogkawaraan no ogduad to dadyagang din duon to sikan no dagpu no nig-ugpo taliwaro kaniu ko dio to sagboka no duma to sikan no dagpu, ⁴⁸ duon dod katongod din no ogkalokat sikandin takas to naruad. Ogkalokat sikandin to sagboka no karumahan din: ⁴⁹ Ogkalokat sikandin to anggam din, woy ko suod din, woy agad hontow pad no langosa rin to koot-otawan din. Woy

ko ogkaruonan sikandin ogpakalokat sikandin to kandin do no lawa. ⁵⁰ Ogsool sikandin woy ka otow no nigboli kandin to mgo tuid ligkat to tuid no induad sikandin taman to Tuid to Pogkukuus. Sikan no mgo tuid ian ka igsokod dan ko monu karakol ka badyad to poglokot su ka iglokot to otow ian ka babadyaroy poron to otow no ogtarabau to sikan no mgo tuid . ⁵¹ Ko moon-ing ka mgo tuid pohondio to Tuid to Pogkukuus, dakol dakol ka baad to induad ian ka iglokot kandin. ⁵² Ko maintok do no mgo tuid no oglopow on ka Tuid to Pogkukuus, sikan ka igsokod dan no malmaintok ka iglokot no litos to sikan. ⁵³ Unawa poron ka pogbantoy to tagtuun kandin to pogbantoy rin to otow no ogbadyaran to pogtarabau to tibon mgo tuid; sikaniu ka ogbantoy no kono oglo-loigan sikandin to tagtuun.”

⁵⁴ “Agad ko kono oglokaton sikandin to iing duon no mgo daan, ko oglopow ka Tuid to Pogkukuus, ogloka-an sikandin woy ka mgo anak din no waro badyad, ⁵⁵ su mgo suguonon ku ka mgo otow to Israil. Mgo suguonon ku ian sikandan no na-aap ku puun to Ehiptu. Sikoddi ka Magboboot no Igbudyag now.”

Mgo Pogbolig Ko Ogtooron Ka Kasabutan

26 ¹ “Dokow oghimu to mgo tinuuhan, woy dokow ogpasasindog to inotowotow woy ko in-oog now no batu, woy dokow ogsabuk to binas-basan no batu to tano now no ogluhan now no tinuuhan. Sikoddi ka Magboboot no Igbudyag now.

² “Doromdoma now ka mgo allow ku to Poghimooy, woy ilaha now ka koddi no in-oog no baoy. Sikoddi ka Magboboot.

³ “Ko ogsundul kow to tibon mgo udlin ku, woy ogpoomot kow to pogbabali to tibon mgo sugu ku, ⁴ ogpa-aapan ku sikaniu to uran to litos no buwan, woy ogpabogas ka tano to mgo pinamua, woy ogbogoy ka mgo kadyu to bogas dan. ⁵ Kono kow ogpakaponga to pogdiok to ginaab no bogas no oglopow on ka buwan to pogpamu-pu to mgo ubas, woy kono ogkatakas ka pogpamu-pu to mgo ubas no oglopow on ka buwan to pog-oorok, woy ogkabuung kow to pogkoon woy waro igkisasow to pog-ugpo now to tano now. ⁶ Ogbogadyan ku sikaniu to maawang no pog-ugpo, woy ogpokohirogo kow no waro igkahalok now no otow. Ogdogilon ku ka tibon mgo mabuut no mgo magintaunan to tano now, woy waro otow no ogklusud to pig-ugpaan now no tano no og-aap to kampilan. ⁷ Ogpakagapun kow to mgo usig now, woy ogkakapood sikandan to tangkaan now pinabadyo to kampilan. ⁸ Lalima kaniu ka ogpakagapun to songo

gatus no otow, woy songo gatus kaniu ka ogpakagapun to sampuu no libu no otow, woy ogkakapood ka mgo usig now to tangkaan now pinabadyo to kampilan. ⁹Ogmarodyowon ku ka goinawa ku kaniu woy ogmoon-ing kow woy ogtooron ku ka kasabutan ku kaniu. ¹⁰Kono kow pad ogtakas to pogkoon to bogas to sagboka no tuid ko oglopow on ka iam no bogas no og-awoon now ka taan odyow no duon ogkasabukan now to iam. ¹¹Og-ugpo a to taliwaro now, woy kono ku ogsamilian sikaniu. ¹²Ogdumaruma a kaniu woy ogkohimu a no Magboboot now woy ogkohimu kow no koot-otawan ku. ¹³Sikoddi ka Magboboot no Igbudyag now no nig-aap kaniu ligkat to Ehiptu odyow no kono kow on ogko-uripon to mgo otow to Ehiptu; piggopu ku ka mgo yugu no intiang now odyow no ogpokohipanow kow no kono ogkagukut.”

Mgo Tungadyow ko Kono Ogbabalion ka Kasabutan

¹⁴“Di, ko kono kow ogpannalinga koddi, no kono kow ogbabali to soini tibon mgo sugu ku, ¹⁵woy ko ogkasubali kow to mgo udlin ku woy ogsamilian now ka mgo balaod ku woy kono now ogtooron ka mgo sugu ku no ogligal kow to pogbabali to kasabutan ku, ¹⁶no soini ka oghimuon ku kaniu: ogpatokowan ku sikaniu to mokohinhinaat no igkahallok, mgo dau no igmaggaso now, woy no ogmoinit kow no ogkabutud kow woy ogmaotoy kow. Kono now ogkapuusan ka pog-orok now su ka mgo usig now ian ka ogkoon to bogas. ¹⁷Og-atuan ku sikaniu odyow no ogkarooog kow to mgo usig now; ogkabobootan kow to mgo otow no nigdomot kaniu, woy ogpanlaguy kow agad no waro niggapon kaniu.”

¹⁸“Ko kono kow pad ogpannalinga koddi takas to sikan, oglogparan ku sikaniu no ogsulian ku sikaniu to papitu no akob tongod to mgo sao now. ¹⁹Ogguguson ku ka pogparakol-dakol now no waro katamanan woy og-unawa to putow ka langit no kono og-uran woy og-unawa to brunsi ka tano. ²⁰Kono ogkapuusan ka dadyagang now, su kono ogbogoy ka tano now to bogas din, woy kono ogpamogas ka mgo kadyu to tano.”

²¹“Ko ogparagas kow no og-usigon a now no ogligal kow to pogpannalinga koddi, ogtimuan ku ka igkabaybadyari now to papitu no akob, no ian ka litos no logpad to mgo sao now. ²²Ogpa-aapan ku sikaniu to mgo mabuut no magintaunan, woy og-agowon dan ka mgo anak now, ogpanghimatadyan dan ka mgo adyam now

woy ogmaintok kow on taman to warad otow no ogkakitaan no oghip-hipanow to mgo daan now.”

²³ “Ko agad takas to sikan kono kow pad ogpamminog to pogsapad ku kaniu no ogparagas kow to pog-usig koddi, ²⁴ songo og-usigon ku sikaniu woy ogsulian ku ka mgo sao now to papitu no akob. ²⁵ Ogpa-aapan ku sikaniu to kampilan no ogsulian kow tongod su waro now toora ka kasabutan ku kaniu. Ko ogpanlaguy kow pohondio to mgo lunsud now ogpa-aapan ku sikaniu dio to mokohinhinaat no dau, woy ogkarakop kow to mgo usig now. ²⁶ Ko ogtamporon ku ka ogligkatan to pan now, sampuu do no boi ka ogpakahilutu to tibon pan now, woy ogkohilutu dan to sagboka ro no hilutuanan. Og-ong-ongoron dan ka pan to pogpambogoy ran. Ogkokoon kow di kono kow ogkabuung to pogkoon.”

²⁷ “Ko agad takas to sikan kono kow pad ogpamminog koddi di ogparagas kow to pog-usig koddi, ²⁸ og-usigon ku sikaniu pinabadyo to kabou ku, woy koddi ian ka ogsuli kaniu to papitu no akob tongod to mgo sao now. ²⁹ Ogkoonon now pad ka sapu to mgo anak now no lukos woy ka sapu to mgo anak now no boi. ³⁰ Ogguguson ku ka mgo tubaranan now to ampow to mgo bubungan, woy ogpooron ku ka mgo tutunganan now to palina, woy oglimuron ku ka mgo namatoy no lawa now ampow to mgo inotowotow now no songo waro goinawa, woy ogkarootan a to pogpitow kaniu. ³¹ Oglupoton ku ka mgo lunsud now woy ogguguson ku ka mgo in-oog no longod now, woy kono ad on ogkohomutan to pogngarog to mgo igpanubad now. ³² Ogmarooton ku ka tano now odyow no ogkohinaatan to mgo usig now no og-ugpo duon. ³³ Igpansawod ku sikaniu duon to mgo loinloin no mgo nasud, woy oghuabuton ku ka kampilan ku woy oggaponon ku sikaniu, woy ogmarooton ku ka tano now woy ogko-ongkoran ka mgo lunsud now no nagugus. ³⁴ No bali ogpakagoram ka tano to mgo tuid to poghimooy rin tagood no og-ugpo kow duon to mgo usig now no waro ogtarabau duon; sikan ian ogpakahimooy ka tano woy ogkabuung to mgo tuid to poghimooy rin. ³⁵ Tagood to tibon mgo tuid no waro ogtarabau duon, ogpakahimooy ka tano to mgo tuid to poghimooy no waro now toora to duon kow pad. ³⁶ Oghinallokon ku lagboy ka mgo otow no ogkagaat no nig-ugpo taliwaro to mgo usig dan odyow ko agad ogdinog sikandan to doun no naladyap to kaamag ogpanlaguy sikandan. Ogpallaguy sikandan unawa to otow no oggaponan to kampilan, woy ogpakarogpak sikandan agad no waro niggapon

kandan. ³⁷ Ogpokogsalsaligkat sikandan iing to oggaponon sikandan to kampilan, agad no waro niggapon kandan. No sikan ian no kono kow ogpaka-atu to mgo usig now. ³⁸ Ogmammatoy kow duon to taliwaro to loinloin no mgo nasud woy unawa to og-aboongon kow to tano to mgo usig now. ³⁹ Ogmaggaso ka mgo otow kaniu no ogkagaat no manokal dio to tano to mgo usig dan no oglogparan sikandan tongod to mgo sao dan woy tongod to mgo sao to mgo amoy ran ogmaintok sikandan.”

⁴⁰ “Di ko og-abin sikandan no nakasao sikandan woy og-abinon dan ka sao to mgo amoy ran no nig-atu koddi woy no nig-ongkod koddi, ⁴¹ no ian ka pugtian to pog-atu ku kandan woy to pogdogil ku kandan pohondio to tano to mgo usig dan - no, ko ogpasaad-saad sikandan to goinawa ran no nigparakol-dakol, woy ko ogbadyaran dan on ka logpad tongod to mgo sao dan, ⁴² ogdoromdomon ku ka kasabutan ku ki Jacob, ki Isaac woy duon ki Abraham woy ogdoromdomon ku ka tano dan. ⁴³ Hoo su ogko-ongkoran dan ka tano woy ogkabuung sikan to mgo tuid din to poghimooy tagood to noongkoran dan. Ogbadyad sikandan tongod to mgo sao dan su pigsamilian dan ka mgo balaod ku woy pigdomotan dan ka mgo udlin ku. ⁴⁴ Di agad to sikan tibo, to dio sikandan to ugpaan to mgo usig dan, kono kud ogsamilian sikandan woy kono kud ogdomotan sikandan odyow no ogkoubus sikandan ogkaawo, su ko warad sikandan kono ogkatood ka kasabutan ku kandan. Sikoddi ka Magboboot no Igbudyag dan. ⁴⁵ Di tongod to koid-u ku kandan ogdoromdomon ku ka kasabutan ku to mgo kabuybudyagan dan no pig-aap ku ligkat to Ehiptu to tangkaan to pogpitow to mgo koot-otawan odyow no ogkohimu a no Magboboot dan. Sikoddi ka Magboboot.”

⁴⁶ Sikan ian ka mgo udlin, mgo balaod woy mgo tuaro no inpalogsad to Magboboot dio to bubungan to Sinai taliwaro kandin woy to mgo otow to Israil pinabadyo ki Mosis.